

桐溪耆隱集  
附補錄

袁炯集

桐溪書隱集

本館據漸西村舍  
叢刊本排印初編  
各叢書僅有此本

# 桐溪耆隱集敘

睦州詩派。胤之滕元秀諸公。方虛谷謂其集。自南宋時已多亡佚。至列代作者。亦未有詩徵總集。蒼萃存之。存者僅別集落落數公耳。其體律要亦不必盡合。第眎其才性孤詣所至耳。於流派乎何有。此以一郡之詩論也。桐廬僻左。文物樸陋。裁方罫縣耳。然唐之方雄飛章八元孝標及碣。皆有能詩聲。北宋之江晦叔。南渡流寓之江子我。呂居仁。及汐社之嚴侶。元末之徐方舟。代有作手。

宋倪隱君千乘。方侍郎慤。以經學著聞。南宋先待制機仲府君以史學顯。明代

姚文敏俞莊。襄俞薩諸公。以事功顯。皆非專業詞章。故不之及。

其人匪特寄意篇章也。抑亦風節介然。砭激頑慳矣。入國朝百六十年間。巖澗

耕釣。畸材閒生。乾隆中。修府志。縣乘。及阮文達輯兩浙輶軒錄。以僻左之故。蒐錄寥寥。遂爾闕如。至嘉慶以後。詩亦無彙輯之本。中更咸豐辛壬兵火之劫。文獻漸蕩。社稿差足諷誦者。訖無留餘。雖有丹沙竹箭之異。付諸蟻鶴蟲沙。乃與遺民同燼。鑿篇斷句。蕴湮終闕。可慨歎已。今就耳目所及。諸老先多方搜錄。存之文句。芥落裁存百一。俾將來修圖經述人物者。有所据依。同里有好事者。幸繼予廣爲采訪甄錄。以存其真。或能推茲義例。廣蒐一郡之作。以補吾闕憾。則亦不亡耆舊之志也。夫。同治戊辰冬十一月長至日。芳郭里人袁炯義庭父識。

桐溪耆隱集一卷

目錄

江退谷詩六十二首

俞培庵詩十首

方雲巖詩二十二首

方壺山詩十七首

款圃伯父詩四首

用疇叔父詩九首

箕村季父詩九首

僧雪訪詩八首

江肇瑛

字退谷，桐廬縣人。道光丁酉科副榜第一。性韻簡淡，好游名山水。若耶四明蒼溪天目，無不攬其幽勝。每信孺園若客授，愛聽松聲。云他日得營草堂常勝曰聽松，意者太古之遺音耶。友人袁世紀揚取惠山李少溫聽松二篆贈之。君狂

喜累日，幼時年七十餘，貧無所有，陶器單衾，壁經散帙而已。有集五卷，又著瀛碧樓雜錄。仁和譚廷獻弔君詩云：老友桐廬江退谷，聽松讀易道心生。誰知名士流離死，我尙來爲訪戴行。嘗評其詩云：山水清音也。

西方菴養病

松檜陰陰覆上方，碧巖雲過靜聞香。樗材無用偏宜嬾，病骨驚秋較易涼。鳥亦忘機來佛殿，草皆隨意長禪房。更深萬籟俱空寂，學坐蒲團禮法王。

獨山卽事

山在縣北二十里

細雨溼如霧，白雲低在溪。山高絕飛鳥，村遠尙聞鷄。荒砌古苔蝕，野田春草齊。老僧行未返，鐘發覘歸蹊。

二月十六夜

飲啄無非是夙因，勞勞亦自覓風塵。客遊夢覺家鄉穩，人世緣惟骨肉真。晚悔詞人多結習，靜涵道氣愛清貧。短檠閒坐齊真妄，細究身名竟孰親。

夜歸朝陽書院

負郭藏幽境，蕭然度曲蹊。楓丹經雨闌，野黑入雲低。列岫僂凌屋，疏鐘寒過溪。歸來深院靜，梧葉亂鴉棲。

冬日

繁華景色厭陳陳。黃落乾坤轉寫真。遠岫疑松猶聳黛。荒蹊蹋葉忽逢人。細看草已含生氣。旋覺梅都作小春。往復陽和原不遠。惟將詩興待時新。

山房卽事

雲近樓添障。山高樹易風。古藤畦欲絕。野竹路成叢。意倦邀僧話。心閒與釋通。春深猶未覺。此地少花紅。

春日桐君禪院

一夜風狂吼。山房未穩眠。白雲猶在岫。春水欲漫田。清籟空塵境。晨光淨野煙。不緣來絕頂。高趣少人傳。

君山懷古

路出林梢迴。門含海色秋。瘦槐高覆殿。頽塔近支樓。世外無丹竈。人閒有白頭。道旁尋石刻。仙跡幾行留。

述懷

須是男兒有性情。脂韋何事苦逢迎。千年讀史心猶熱。一日論交膽肯傾。畢竟負人非上策。豈能隨俗盜虛聲。至今拋卻居山寺。怕聽人閒有不平。

家世深慙節義門。敵廬常住綠楊村。艱難乞米分兄弟。珍重留書待子孫。時見澆漓空有恨。況兼骨肉豈無恩。頻年潦倒成何事。孤館他鄉烟樹昏。

八月十四夜閣中作

秋風清迴棘門烏。更鼓頻催一一聽。起看中天雲少處。一輪明月一丸星。

贈友

多事媧皇土一搏。升沈推究竟無端。名成豎子千秋易。天困窮人一飯難。羊角友朋長契闊。首陽薇蕨久摧殘。英雄有志身須惜。吳市簫聲興未闌。

轉瞬

轉瞬茫茫數十春。可憐東海已揚塵。嗣宗痛哭東方謔。盡是銷沈一世人。

感事

世謂申生愚。惟愚孝乃真。古今說權變。豈可施天親。晉國始構禍。陰險殊遂遂。驪姬雖悍虐。猶是君夫人。施優爾醜穢。設念胡不仁。卻令父與子。變作楚與秦。太子縱不爲蒯瞶。盍磔施優傲逆臣。我知太子心不敢。當日情事關天倫。施優深知太子意。益肆橫毒鼓讒脣。吁嗟乎晉太子。太子不敢優人敢。老烏夜哭銅駝曠。

枕上口占

秋氣無多已逼人。舊衾故絮愛相親。半生結習閒中悟。一夢荒唐醒後真。窗外雲山憑放眼。樓頭圖史許藏身。莫從九辨悲搖落。玉露金風滿眼新。

悼女芸兒

天涯非遠海非深。縱隔形骸不隔心。咫尺孤墳悽絕處。西風衰草日初沈。

怨婦行

生小貧家女。粗樸性所甘。對鏡頗自愛。貌惡心不慙。所天慕榮勢。許字富家子。蹇修難重違。命薄從此始。入門嫌妾醜。開奩惜妾貧。三年不一顧。同室如路人。有淚不敢彈。有言向誰訴。自省實無尤。此生竟自誤。寂寂春日中。春花爲誰紅。秋風滿庭院。淒冷悲梧桐。梧桐信可悲。妾心知者誰。將妾比梧桐。深愧黃金枝。梧桐經風霜。黃落不留影。明年春復生。與花競韶景。如妾愁復愁。青春易白頭。頭白不復黑。對花空自羞。

聞應敏齋

寶時

誦周小園詩有懷其人詩以誌之

小園名閑。秀水人。其  
尊人曾任嚴州都司。

將種能文少。如君當世無。時平不用戰。志在且爲儒。悲壯英雄託。纏綿血性俱。天生詎終棄。經濟補孫吳。

正月十七日重哭芸兒

女兒亡日是今朝。念到傷心骨也消。欲祭不能忘不得。很聲和淚讀離騷。

松風

時厲師

谷菴

愛聽松風號草堂。滿山清颯到禪房。來從遠壑秋濤暮。響入遙空野宇涼。葉細自然饒韻致。翠深何處著飛揚。陶公詩味莊生夢。未許粗人一領嘗。

題嚴雪舫

國士

取解立飲圖



射策不中飲墨汁。皺眉有似長鯨吸。我思此法殊未佳。枵腹一時格不入。何如不中飲以酒。持杯笑語同射耦。前生自是晉劉伶。與酒有緣常到口。我亦登堂受罰人。看圖情事十分真。良弓且莫輕收拾。終鍊精。心貫螭輪。

春日卽景

淡雲初散午晴天。潮落江平岸泊船。最是鄉村春好處。梅花數點竹籬邊。似白沙陳文恭率意之作

有見

西子賤時隨浣女。臥龍貴後識天人。野花嬌好無名字。誰解風流本色真。

余有楹帖云。一身以外無非物。今而知身亦一物也。猛省有悟賦以見意。對句千載之中。適有今

此身亦一物。於世復何求。白眼狂多事。青春去不留。獨行聽鳥語。閒坐看泉流。妙理南華悟。無分蝶與周。

禪意

能空成佛也非難。坐上蒲團地便寬。天使西方開一派。卻教煩惱變欣歡。關佛曾經數大儒。世人崇奉總如初。須知日暮途窮客。惟有禪林可寄居。宣聖言仁四海周。慈悲祇解一身修。若知清淨全生法。愛懼何來沈隱侯。持齋嫌俗參禪誕。疏曠何妨愜性天。白社能容陶靖節。正如琴韻不關弦。

雜感

敵廬高臥擬蓬萊。身世盈虛試細推。人到難容惟度外。天如可必待將來。有時且養和平福。莫漫輕施跡。弛才老子善柔莊。善達自然妙理此中該。

四月二十四日宿北鄉田家

芳樹爲鄰屋倚山。清和時節薄寒天。老農夜半呼兒起。趁雨今朝種旱田。

讀詩

但能真切似風騷。商徵天然上口調。多事阮亭聲律譜。只從喉齒按腔描。國色天姿信最難。笑他朱粉與羅紈。少陵刻苦青蓮逸。那有浮詞犯筆端。樂府流傳焦仲卿。俚言俗態只人情。但須道得胸中事。任是精心鍊不成。別有襟懷世不知。盤空奇麗近騷詞。小儒株守無多識。不信人間李賀詩。輒語輕詞說雋新。可憐風雅不能真。豈知名士生來韻。野服山裝亦可人。懶祭無才便費辭。枝枝節節強爲之。詞多意寡終爲累。無將何能統衆師。風氣原隨世運移。蔡唐倣宋亦何爲。七篇孟子談仁義。大似機鋒國策詞。瘦鳥寒郊亦性真。詩中有我始精神。畸才體格心如許。鳳閣鸞臺自有入。

自檢詩草

開卻昂藏七尺身。消磨歲月耗精神。不刪爲有傷心淚。欲語應難索解人。烏處樊籠音亦惡。龍無雲雨性都馴。善鳴祇愧非東野。孤負窮愁五十春。

感事

春日暄妍草亦榮。秋風憔悴菊多情。不能諧俗知非福。大抵生才總忌清。千古文章騷變格。一生遭際酒成名。老天開此崎嶇路。畸士都教偃蹇行。

高月航明府

斗南

贈余詩序有知己之感奉呈一首

行年已五十。機械猶未知。見人與我善。輒自肝膽披。豈知覲而笑。中有利刃隨。當前一尺地。渺若天之涯。語言變黑白。蕩平成險巇。須臾大海闊。洶泝相奔馳。賤性故坦率。安識世路歧。困橫已交迫。廢然乃自疑。反覆思不得。聊復任所爲。生性不逆億。往往受世欺。有如病膏肓。虛扁不能醫。人方笑我拙。欲求知者誰。今春江水漫。放棹清溪湄。幸得景度薦。

楊襄堂明府

鹿洞濫臬比。庭謁挹謙光。置腹將心推。高懸人倫鑑。照我

衷寸私。謂我無城府。信我非傾敬。逢人卽說項。人師勝經師。君企晦翁賢。我慚象山規。乃於二月朔。諸生集階墀。躬執主人禮。率循弟子儀。棟若坐芒刺。斯道懼有虧。公餘浹塵談。索我平日詩。林宗善獎勵。謬承嘉許辭。冲質宛陵調。清妍姑溪思。胸有真性情。不用強作之。譬彼玉質瑩。絕不掩瑕疵。我生固如是。我詩頗效茲。噫嘻君一言。大足沁心脾。世事善雕飾。鴻章驚陸離。真意杳難得。枯榦繁其枝。閒語忠孝事。語態

殊淋漓。特恐肖以貌。造作多支離。試觀三百篇。勞者歌其辭。類出胸臆語。艱深無所施。愧我功力淺。公評未允宜。公學期復古。作吏蒲鞭慈。撫茲分陽民。俾各行以嬉。惟以至誠導。權威安足治。如君洵粹白。於我真師資。

雷 甲寅二月二日

陰陽相激忽成聲。天縱無言示以鳴。鬱極必舒機已早。靜終有動理常平。疾驅風雨樓臺暮。狂震山河草木驚。會得振豐深意在。中宵屋漏盡神明。

玉華書院二桂今秋不花戲爲解嘲

梧桐有葉看將老。桂樹無花亦覺香。名士不妨存意思。通材大抵略文章。也知時務非宜冷。或斂才華且善藏。自立但須根本固。秋風來歲定芬芳。繚枝新葉翠森森。已占秋來第一林。不藉時光增氣色。仍如平日見胸襟。敝衣垢面原欺世。流水柴門足賞音。雲外天香應不俗。此閒風露自幽深。

雜感

君子當容人。勿爲人所容。尊拳一笑謝。胯下非不恭。虎豹目如電。曾未見螿蟲。瑣瑣弄機智。思以辱英雄。英雄有真量。豈足滓淵衷。

李陵固身辱。其心亦可憫。孟達旣降魏。命仍爲蜀盡。紫陽綱目以死之善之。奇士不可測。安能遂泯泯。將欲大有伸。何

妨須與忍。以達折陵獄。漢武未平允。

和邱瓊仙靈山庵題壁韻

曾慕元龍百尺樓。顏唐空擲幾春秋。東阿魚梵時閒聽。靖節山經當臥遊。世路難行堅立腳。老天低壓敢擡頭。而今悟得真如意。雲自無心水自流。

一似李習之  
參藥山語

借雲書屋卽事

作客年年似徙官。到來傳舍便能安。山頭松翠搖窗溼。谷口泉聲入暮寒。回首舊遊驚歲月。偶談陳跡半闌珊。祇今差喜新桃李。雨露初勻著意看。

早起偶成

敢道詩書竟負余。硯田雖淺未曾蕪。頭銜甘署村夫子。怪物羞爲老腐儒。勁節九秋須不變。好花三月豈能無。附炎嫉俗皆多事。貧士當防意氣粗。

反舌

一陽初轉好歌來。夏至陰生口不開。當日東坡如解此。有何詩案到烏臺。

題畫四絕

春入桃花源。刺船相與語。莫更怨秦人。因秦得佳處。  
幽篁繞石生。新翠著衣溼。有客據枯梧。微吟似寒拾。

秋山倚空淨。秋樹剝心健。林臥把卷看。次寥養生論。  
天地入蘊廬。意境極清放。勝事常獨怡。巖扉自來往。

秋夜雜感

便從騷雅盜虛聲。五十年來學未成。慧業不多根氣薄。窮愁今尙負虞卿。

聽松草堂歌

余愛聽松風。其實無堂也。卽敞廬左右亦無一松也。余心嘗有此聲。故以名吾堂。

我幼入山學樵牧。爾日霜寒正落木。翠藹陰濃雲不開。流泉久涸鳥瑟縮。忽聽聲從遠壑來。旋向半空沸。幽谷靜坐石上細領之。緩而不迫清不濁。仙樂遜此人。籟無天然洗我胸中俗。仰視蒼髯微動搖。高者將歇低已續。爾時心蒙不識字。欲寫不能言不足。自此每聞松風來。得意若忘神與屬。家貧苦乏買山錢。名以草堂誌所欲。時借僧寮作流寓。喜對此公助清淑。自笑學詩卅餘載。草經刪易三四錄。得似松風一字無。移情愧負成連曲。  
達哉神茂真觀復。心明衆塵消矣。

詠史

至性何論事易難。要扶大義立人寰。感深易水神先王。烈到文山氣轉閒。天地此生期不負。男兒一死豈無關。可憐八姓馮長樂。欲把鴻毛傲泰山。  
此類句律。徵爲船山衣鉢所累。

移居雲門寺

雪後風猶割面寒。春深花事已闌珊。燕無定主年年換。蝸有隨廬處處安。一鴟白雲僧舍靜。四圍清蔭客樓寬。自知福命書生大。不向璜溪把釣竿。

家居

雅愛吾廬好。由來樂意存。老饕疏食健。寒臥布衾溫。公事未嘗至。野夫相與論。秧鍼方刺水。風景喜迎門。已苦塵勞久。於今竟亦歸。故人驚忽老。舊徑訪都非。菜味土膏足。麥胎春雨肥。太平多樂歲。不羨首陽薇。小園附老屋。環處兩三家。留樹皆成幟。編籬半是花。好音多燕雀。生計足桑麻。隙地年來少。牆陰盡種瓜。良友動深契。有時頻往還。材疏何所用心。在未能閒。文格爭相究。詩鈔各就刪。英流盡年少。吾老喜追攀。

俞國楨

字培庵。桐廬縣貢生。能以老子五千言。推行太乙壬遁之術。與人言龜策。率依於忠孝。然吉凶每多奇中。積學士也。於近代考據家。如該餘叢考。隨園隨筆諸書。多所糾正。

贈袁復初先生

峨峨千仞岡。仰止不易涉。汪汪千頃波。修綆莫能測。崛起有名賢。端厚天所植。何必競勳名。絕羣在盛德。我愛復初君。躬範重鄉國。崇深孰可幾。願言共矜式。少年負豪氣。舉事隨時流。弩牙憑四應。激烈抒材猷。中道何所見。忽爲易轍謀。雕也琢爲樸。鋼也鍊而柔。士範欽族郇。儒風企魯鄒。逸矣寥廓翔。藪澤何從求。勤積幼學功。雅抱用行想。七獻玉不售。翻然脫塵網。讀書味義根。不復爭浮響。捐產營百城。四部搜羅廣。

既教夙好伸。且爲來者餉。屋上亘卿雲。時睹輪困象。  
端居嚴比匪。待客情偏隆。故交及時彥。絡繹庭軒中。  
人謂無事忙。家計增窮空。君聞付一笑。敬謝道不同。  
蔓草感鄭咏。杖杜賡王風。三益有深懷。非效陳孟公。  
風氣日以降。子弟競浮誇。擾擾城市閒。積習尤無涯。  
君獨守世範。庭內如官衙。勤職戒惰慢。製行防回邪。  
內外家政肅。過者生歎嗟。修整擬鄧氏。質行仰石家。  
不涉游觀場。不講鑽營策。不樂事宴酣。不肯近博奕。  
徘徊堂室中。澹泊娛朝夕。溫良旣歌齊。損益還味易。  
別有樂地存。安肯爲物役。風趣孰與儔。高懷緬古昔。  
特重燕翼方。厚禮延師友。不恤指畫勞。時復親誨誘。  
翩翩二瓊枝。才華絕比耦。繼起皆林蕙。清風溢戶牖。  
積金競勢家。此樂蓋未有。立德非偶然。佇觀昌厥後。  
歲月冉冉迫。幾度困沈疴。偶聞枕席淹。終夜嘆奈何。  
何幸蹶復起。餘年任婆娑。調攝雖云勞。奚堪敵病魔。  
端賴賞善者。默護爲功多。念哉毋自薄。珍重保天和。  
緊予通蘭臭。幾及二十春。不鄙疏野姿。翁羽有前因。  
設榻防護切。進羹餽眠頻。卑幼各喻意。愛重難具陳。  
老去學淡忘。萬感付沈淪。惟有不爲齋。

君延客校勘  
藏籍齋名翹念頻勞神。

晦翁小學書。勵行標正鵠。蒙士讀或難。未免等廢錄。  
鄙人加校讎。學識愧未足。君顧勸刊行。養正有同欲。



信友念或偏。覺世情自篤。鈔成待鑒裁。引領冀忠告。

方毓瑞

字雲岩。一名辛。桐廬縣人。道光丙午科舉人。少有雋才。學使羅公試以大成殿賦。君用魯靈光殿賦原韻。所差數韻。耳時年十六。塾師嘗命對云。孟東野射鴨。君應聲曰。秦西巴救甕。君工屬儷詞。警敏先滯類如此。下筆千言立就。微嫌

才豪氣猛。蝟蚓雜下耳。君頗習手搏之技。咸豐辛酉冬。桐廬失陷。鼠賊不風。賊刃傷鼻。猶格鬪移時。手刃數賊。死事甚慘。詔卹贈如例。

訪元英先生故居

羅宗師考古學題

山色沈溪倒景明。傳芭何處訪先生。破扉經雨苔花溼。故徑留烟石氣清。殘墨昔曾餘硯沼。名流今未冷詩盟。書香一脈傳孫子。牆角時時認短檠。

留侯

喬木彫蘂韓世家。淮陽學禮避荒遐。晚知依隱曲仁里。早誤驚奇博浪沙。一笑厲言黃石塚。終難出世赤松家。成名薜蘿良多偶。服食輕安亦有涯。

無限寄託  
感遇之遠

淮陰

漂渚遲徊乞食腔。將才天得竟難雙。萬家烟冷淮東冢。一轍功成井口幢。鍾室妄傳臨沒語。木罌豈任渡軍艘。史言誣枉何堪信。古事淆譌亦太厯。

陸賈

攜得千金寶劍歸。從容舌論擁輕肥。雄談坐折名王氣。片語能祛右相機。所著第如長短說。處身能免墨  
儒譏。無端全德梁人志。種果義之亦庶幾。

梁簡文志。古今全德之人。以陸大夫爲首。右軍  
辭世帖云。欲依於陸賈班嗣楊王孫之爲人。

謝臬羽竹如意歌

松風謾謾吹村鷗。落日低徊常溯戶。竹石聲中變徵悲。千載西臺泣臬羽。偏安殘局已陵谷。勤王師孰摧  
索虜。油幕晚餘丞相客。寒鴉沙社增悽楚。燕臺何處更招魂。朱鳥一聲闕塞苦。手持如意浩然嘆。淚滴空  
山溼芳杜。此竹柯亭笛不如。非復從容謝家壘。吁嗟魂兮不歸來。許劍亭荒苔蘚古。寒泉一勺醉雲旗。起  
折山花爲公舞。

錢武肅王錦樹歌

人生快意當何如。衣錦晝行良不虛。輝生草木餘杭陌。塔照金塗日色餘。天目之山垂兩乳。時來霸氣山  
川舒。英靈崛起得憑阻。夢占腸透閭門居。十州一劍開雄鎮。山越餘孽資驅除。終收版圖納炎宋。仍芘苗  
裔鏘瓊裾。當時還鄉譙父老。錦袍玉帶巡田廬。檢點昔年游釣處。溪光山色迎朱輿。王周覽之暢然喜。以  
錦挂樹誇耕漁。里巫畦叟盡懽躍。烟林春麗迴扶疏。後車定載羅昭諫。授簡爲咏張其閭。至今村叻傳軼  
事。樹老空心根窟魚。叢祠香火游女盛。略似花開陌上初。

集歸去來辭題畫

雲壑觀流趣自存。盤桓菊徑倚松門。攜琴命酒消憂戚。矯首臨風樂寄樽。

其二

岫倚窗南看鳥歸。門臨松逕有雲飛。歡來策杖觀園菊。泉壑風清時入衣。

合江亭

滾滾江流碧映天。風亭閒望水容鮮。湍明素練縈窗外。山送清輝到檻邊。折柳時時聞短笛。憑欄一一數歸船。穿雲欲采桐君藥。瑤草芝英可駐年。

馬氏林亭

近水林園趣最幽。千巖萬壑一窗收。路緣石角穿雲上。亭壓花梢映竹浮。仰見雲光團翠岫。遠看帆影入蘆洲。不須更覓丹邱侶。此樂真須物外求。

秀歧堂

逸書先代記嘉禾。雙穗曾欣瑞麥多。野老早傳三白謔。斯民猶唱兩歧歌。定知福地呈靈貺。想見康衢仰太和。爲問虛堂誰署榜。漫同綠野映烟莎。

大雅宅

鄉名至孝里求忠。誰似斯人德義豐。千載菱溪傳盛事。一州名族仰遺風。能馴羣鳥真純士。可感祥烏見

苦衷擬向水南尋故宅。苔扉應在綠陰中。

清芬閣

偶挾詩瓢住鏡湖。千秋涉想笑顏臞。龍梭織字憑誰和。鶴嶼留題只自娛。逸跡不妨僧寺寄。清名猶與釣臺俱。至今高閣留遺趾。文藻傳家有畫圖。

吳江夜泊

扁舟今夜宿吳江。隔岸涼鐙照水窗。渾忘信明佳句好。自吟楓冷對漁缸。

遊虎阜

用同年蔡模  
菴孝廉韻

天繪靈奇映碧波。拾舟登眺定如何。石經履迹苔花少。碑列亭陰蘚字多。紺宇香臺烟不散。劍池寒水鏡新磨。二何舊隱今蕪沒。應贖題名待手摩。  
梁處士何求及從弟允俱隱此山。

江村

江上碧雲生。蒼蒼葭菼暮。高柳不聞蟬。野樵時問渡。我欲叩苔扉。岸荷微有路。小立暝沙頭。平田飛一鷺。

宿車邏汛大聲發於水上。睡不成寐起賦七古一章以遣旅懷。次日果風息浪靜安穩渡河。

扁舟夜宿蘆花洲。月光照水涼烟浮。更闌人靜我欲睡。大聲忽到江邊樓。江邊獵獵喧蒲葦。響激春濤打船尾。蛟龍暮挾水雲飛。強弩射潮曾有幾。宵深萬竅猶怒號。江神海怪騁雄豪。蓬萊圓嶠知何處。猛厲直

疑驅六蓋。我祝風師靜波浪。水國憺安憑默相。涉川舟楫便往來。乞與祥鷗扶客舫。漱罷潮平風亦平。須臾萬籟寂無聲。明朝依舊紅輪擁。高挂雲帆上玉京。

春日湖行觀水鄉風景

鴨頭綠水泛輕舟。兩岸人家枕碧流。暖入春波爭放鴨。翠深烟樹未鳴鳩。菱蘆處處編魚簾。楊柳依依拂酒樓。是處天然好圖畫。營邱妙趣筆端收。

園碑

黃旗紫氣久應窮。寂寂殘碑草棘中。笑倒東京餘識學。誤人符瑞獻諛工。

謝文靖土山

江表風流屬謝公。碎金一卷已俄空。土山雅集無人繼。紺宇青林夕照中。此思救時賢相之意。

戲馬臺

鬱鬱離離綠草柔。項王曾此試驂騑。據鞍氣欲吞三輔。踣鋏心期蹴九州。霸業蕉中看鹿逐。悲歌帳外割鴻溝。英聲消歇荒臺寂。休怪當時笑沐猴。

董江都故里

元狩經生第一人。清明繁露豈華身。誰知阿世菑川牧。能使先生骨相屯。刺時之作。言蔽賢者衆。

方驥才

字遠山。桐廬縣貢生。刳心程邵之學。製行不苟。鄉里憚其方直。稍稍化之。詩詞真率。殆至性所寄。無意求工。避寇云舟。行小洞桃源記。足跡荒山杜老詩。山居云石上題詩都即景。山中落葉陡知秋。挽方雲巖云。斂惟布被身難蔽。坐有藜

牀膝久穿。挽申屠筱石云。元晏孝經將欲殉。馬

廂封禪不煩求。意皆沈着。於知舊亦無虛美也。

壽吳一峰七十

吳生白眼向青天。傲骨峻嶒似更堅。老去坐忘無一事。尙能醉漉酒如泉。

山村

竹杖芒鞋石徑斜。盤盤磴道踏雲霞。山深似少樵人跡。忽見炊烟四五家。

重九臥病

佳節新晴景氣和。文園底事困微疴。閉門菊市黃今過。入手橙香綠自搓。綴葉縱幃非正則。松花落壘伴維摩。病牕閒卻登山屐。一卷黃庭且自哦。

偕孫雲卿申屠筱石游閬仙洞

秋高相伴訪仙踪。解得衣裳腳力鬆。髣髴有光從口入。回頭已被白雲封。石壁留題削不成。藥爐茶竈有逢迎。仙人今日莫回避。與爾圍棋賭一杯。看君元似地行仙。乘興來游小洞天。歷過幾重行不得。恐驚虎豹石林眠。出洞閒閒日色斜。相看雙足繞烟霞。樵風送我登歸路。直到橋邊野老家。

重訪東家夜色迷，行踪不日隔山谿。  
鄰人報道登仙去，頃刻雲中有犬鷄。

菜根

傲士微言至理該，味無爽口老君哈。  
寒家一甕餘冬旨，待蹴蔬羊清夢迴。

松

拔地凌霄千丈松，何人手種詰無踪。  
不逢風雨動君子，一夕崩厓定化龍。

梅

老樹根依短短牆，不花孤負此寒香。  
出頭又被風霜妬，遲早梅心自主張。

棗

秋風秋雨實離離，芒刺生來易忤時。  
不避入山刀鋸利，赤心可剖與人知。

賀江養泉移居

吹簫騎牛炯有神，俗疑嵩少煉丹人。  
忽移家具溪南住，書卷牛腰壓擔頻。

披裘公

五月熱不觸，披裘非爲貧。  
寄言皮相士，當世有畸人。

白雲源弔遠祖元英處士

驚帆片片逐飛湍，峽束沙迴石壁寒。  
鶴嶼有情奇句出，鸞臺無分一官難。  
晚居鑑曲追狂監，我眺元亭似

館壇沙社西連謝君墓。英靈文字未摧殘。

桐君採藥

樵人拾箭逐仙翁。問姓無言但指桐。山勢盤盤鸞隼集。鐘烟寂寂菌芝空。方書應授赤松子。餘技漫傳黃

石公。藥錄倘存箋注待。颯然祠宇傍青楓。起勢 飄忽

贈何牧雲大令

輟耕騎竹走童兒。迎候紫芝眉宇奇。吏識戴星賢令出。人歌喜雨後車隨。野蔬入饌供常薄。紙帳清眠夢亦奇。仁政由來經界始。生祠父老已鐫碑。

袁世經

字荻圃。桐廬縣貢生。隱酒工畫。所作樹石溪山。藥樹瓜樹。著墨不多。蕭散獨絕。亦未嘗拘拘古法。縛於前人蹊徑也。村老樵客。或獻酒一甌。席花枕草。隨意搗酒。予之非其人。則一筆勿與。真行書瘦勁。結體頗似唐人。嵩山口授銘。及述聖

頌。桐君厓絕壁下。有大歷題名。人無知者。君獨乘水漲。橫舟厓下。梯登搦之。里人以為狂客。而書奇不懈。熱於明季野史。每攜壺登陟。良辰賦詩。酒中輒云。我卒當以醉死。然天性孝友。篤於內行人。莫能測也。

雜興

雲出溪源窅窅山。雲歸宿我茅簷間。朝攜酒榼隨雲渡。暮扣船舷戴月還。

題隋鄭州刺史李淵為子造象搨本

往復尋常祗憤意。豈知龍起晉陽泉。瞿曇護力亦何有。發願人天事偶然。



戴仲若

嘗居止桐廬後  
人名爲戴公山

一門栖遯負高名。山下猶留屐齒行。終爲衡陽琴一曲。頓輸乃父迹雙清。

事見  
宋書

桐君厓下大歷唐人題名詩一首

世經

平生龜手打石本。荒厓斷碣搜屈奇。鬢絲垂老不自惜。奇鞵目睫幾失之。環洲羣山障合沓。二水交帶流  
城陴。一峯厓斷忽東出。驚翻鍛落山靈批。懸巖下瞰老蛟窟。投以磔犬牙爭劇。炎空往往雷雨作。草木疑  
有腥風吹。不知何年劃絕壁。試絙鐵索梯登危。檣舟岸枯水返壑。捫葛剝蘚粗沙治。呼工洗剔奇跡出。蟲  
虺芴緇芒稻垂。又如山川鼎彝裂。烏躅凌厲緣朱絲。縱橫行列辨星斗。篆勢圍圍正肩隨。

前小篆六行。  
後正書十行。銀魚

朱衣首崔縝。獨孤程薛題名辭。潞年大歷歲癸丑。泛舟張讌窮諧嬰。是時陽冰括蒼令。傳與筆法其徒疑。  
李監體勢最驚絕。變化流峙方員宜。茲跡方之雖郝莒。亦足振起草隸衰。前人游履所不到。從古著錄遺  
屢屨。嗟予東臬被酒誤。乃幸披榛祛瓌姿。才翁翩翩亦風致。坐想篋舫孤村維。乃知世閒奇物多不遇。風  
雨駁蝕生落蕒。斷厓荒松披斫立。石墨在手猿猱催。詒之後來好事者。繼登鴛鴦蠟千年誰。

和

世紀

吾兄滅景棲東麓。僻近藥錄桐君祠。鑄靈浮杯有狂氣。醉倒自署翁支離。扁舟載酒縱所往。異境光氣雲

霞披忽見神清之洞苔蘚合。舟中絕叫靈厓窺。懸巖千仞下有不測之巨壑。枯松倒植驚蟄攀。翻疑沈竿牽纜著石樹。梯上青壁捫差差。沙靈雨凍石髮漉。掬泉磨洗呼工治。大歷八年題字出。厓谷恠發前朝奇。樵夫漁父知者少。篆隸十六行離纒。誰其作者崔處士。非瞿令問非袁滋。美原神泉浯廩刻。方此筆勢差肩隨。跂跂脈脈蟲絡網。離離屬屬梧緇絲。真書亦復具風格。未失敲正莊庸規。才翁何時艤沙岸。僻遠乃赴青鞵期。郭生任昉高詠歇。山川閔寂無光暉。數君翛然泛秋艇。枕簟石瀨蒼山移。登臨酒罷覽未倦。滂魄解衣山僧哈。勝游韻事留篆刻。逸筆餘興酣淋漓。當時塔宇恣叢墨。陵谷朽壤惟存斯。千年閔墊一朝懸。假手石屋山人爲。金石幽恠有時發。躋險獨往誰能規。兄詩勁軼不可輕。醉草凌厲留山陂。裴糧徧訪壇冢刻。以補新定圖經宜。

伯父菽圃石屋山人集一卷。叔父鑛巖晦村集三卷。季父筠村芳郭樵唱若干篇。草本經兵火亡佚。此桐君山下磨厓唐題名唱和詩。從江退谷丈家得之。而失去季父和作。良可惜也。江丈評云三袁皆有雋思。菽圃奔放似王逢原。鑛巖沖淡似梅宛陵。筠村博瞻似宋景文。伯父沈放于酒。有作輒棄去。不自珍弄。嘗見其登謝翱許劍亭作歌。尤奇崛不可控搏也。以上皆瀛碧樓雜錄中語。從子振暝

敬識 一名  
炯

附記題名存字

殿中侍御史崔縝。桐廬縣令。獨孤勉。尉崔泌。司李稅。崔澈。□□□□□□□□

大歷八年九月廿二日 右小篆六行可辨者  
卅二字字約徑寸許

崔浚篆 三字緊接  
月日正書

初秋九月游□周寬之治平 周寬之疑北宋人治平□年初秋九月  
游石文既泐搨亦傾倒失次理或然耶

桐廬縣令獨孤勉前左金吾兵曹薛造處士崔浚桐廬縣尉程濟□□□□□□□□

大歷□年十月□四日題

皇祐庚寅夏蘇才翁來觀

右正書十行行五字。後有蘇跋十字。字皆徑八九分。皇祐庚寅。宋仁宗在位之二十八年也。蘇才翁當是子美之兄。名舜元。仕至轉運使者。抑別一人耶。觀太山題名。有石延年祕演來六字。石曼卿稱名不自書字。此稱字亦一疑也。

篆法極似尹元凱。畧令問。塙是唐篆也。懸厓陡壁。下瞰深淵。江水稍落時。機舟其下。扳藤猿登。剔苔僅乃可辨。欲欲擅椎。必募工搭陰架。苦無立木處。不知當日何以摹刻。前人好奇。風趣乃爾。厓左右方。題字尙多。以險絕不可迫眺。摩挲而止。斯游猶有憾。怯士殆不免於樵夫笑之耶。唐書崔氏世系表。清河小房。有温州刺史澈。博陵之崔。有刑部員外郎泌。系屬不同。時代非次。未必卽此文泌澈也。

右文予力疾手搦。僅得數紙。令尉司李姓名。當補入邑志官師表。咸豐壬子秋九月石屋山人漫記

袁世紀

字用曉。桐廬縣優行廩生。有晦村集三卷。遺亂亡。失遺詩若干首。僅從王芹甫家故書中檢鈔得之。

劉熙載敬填諱

晦村卽事

源深路絕礙浮槎。策杖幽尋詎有涯。榭葉封山迷故術。楊花覆磻漲新沙。偶偕村友聽泥鶴。閑任癡兒捉草蛙。最愛叢篁白茅嶺。題名竹上帽簷斜。

溪上泛舟

漸去市塵遠。稍登漁者磯。青蟻嘯藤落。白鷺背舟飛。垂釣吾何迫。躬耕俗豈違。徘徊此潭上。酌水自忘機。

兒子上學口占爲戒

未問兒材與不材。寒花晚翠莫輕開。讀書養志家常事。勤樸能甘福汝胎。先公分器一牀書。經世安人政要渠。須戒歧塗賊與穀。愒成易辨孰龍豬。莫厭頻聞長者言。細從枝葉討根源。不材於爾無多責。卻檢過庭舊錄存。

稽留山

太平寰宇記。黟隱山。在錢塘縣西十五里。許由隱此。入去忘歸。故一名稽留山云。

許由唐四岳。晚遜箕山陽。應借巢父犢。備耕宿春糧。如何乃隱此。世語疑荒唐。抑愛南游屨。冷泉流石牀。手挂木癭瓢。風林意何長。是時佛未興。所憩卽道場。至德爲鼻祖。開山一茅堂。諸天皆晚出。蘭菊嬾奇芳。

不知有虞夏。乘雲翔帝鄉。清風颯千載。遠韻滿谷阮。

答江退谷

早梅折贈有奇春。擺落人間爪與鱗。九里洲前墊巾客。千峰樹裏苦吟身。寒於烏佛詩孤聳。悶遣辛迂酒幾巡。奇字凡將鈔一卷。支離江式未全貧。

將尋大滌書院懷黃石齋先生

大滌陽坡宜結夏。瑩山石養已荒筠。厲言取適從非馬。歧路銜悲豈在麟。想見蕭辰宴坐處。至今芳草講臺春。從無金石隨流靡。待叩真源一問津。

袁世緯

字貧邨。桐廬縣貢生。咸豐辛酉邑亂殉難。事蹟見浙江忠義錄。

和友人山居雜興八絕

莫笑曾棲芳郭客。山居樂事未躬親。白雲源口浮槎去。欲叩元英與卜鄰。材全恥作餘牛歌。知住深山意氣和。亦有奇書通浩國。野心未肯逐雲羅。布穀催人不住鳴。山多田少肯深耕。西成有日應秋賽。爲備迎神篋入成。燒畝無稅闢奇荒。休怕官租不易償。山澤雖稱爲國寶。未聞加派議宏羊。試攜弟妹採名山。但乞樵風便往還。倘遇神仙無別願。心平自覺遠塵寰。

樹上鷄鳴屋在巔。春奴汲婢亦翛然。白雲就我擔閒宿。始覺身居第二天。  
莫道山人喜入城。巒嵒偶傍陌頭行。西巖欲逐漁翁宿。不使移文惹鶴驚。  
深巷人歸犬夜噪。千年枸杞釀春醪。何須拔宅俱仙去。枕石浮杯亦自豪。

江枕

晚臥何曾穩。江樓秋意生。燈青飢鼠出。月落亂蟲鳴。萬事濁流去。孤舟積岸橫。枕函藏古劍。應悉此時情。

戴雪訪

亡其名。以字行。桐廬縣諸生。後棄去爲浮屠服。集中有龍飛六十年祝。蓋詩。又云吾年五十二。頗亦憚行役。則知爲乾隆中人矣。野興詩云。溪雲隨客渡。林鳥向人呼。秀句也。以方外故殿卷末。

合江亭

天目新安派合流。危亭分占兩江秋。千峰環袞青成闕。二水交縈碧繞樓。烟際鳥還帆影轉。海門潮上曙光浮。奔濤濺沫趨秦望。靈境居然控上游。

池上

池館通幽處。焚香栖散人。泉清濯白足。藻密出紅鱗。坐臥得天趣。往來無世塵。好將活潑地。收拾等閒身。

閑樂

屋邊種竹引幽禽。籬下栽花供醉吟。試叩幾年塵夢迹。何如一片野雲心。避弓鳥入寥天適。怯餌魚知大壑深。但得浮生閒復樂。閉門隱几卽山林。

邀陳石村游大奇山

一名寨基山，大約孫吳時山越之井竈存焉。

村南十里大奇山，地僻林深景物閒。石壁倚天猿叫絕，風藤挂月鶴飛還。苔封陰磴藥無路，雲散陽崖柵閉關。最是晚秋紅葉好，一樽可許共開顏。

將赴應州與弟諧別

南北各天情繾綣，弟兄分手意酸辛。相看拄杖都無語，累爾高堂白髮親。餘杭老僧爲予薙度因贈

清羸如鶴一身輕，卓錫飛來到此行。新定州南淨土寺，爲予摩頂說無生。郊行

人家深竹裏，古寺野塘西。車馬聲方寂，繆鉏出未齊。

閩仙洞

洞口千年蝙蝠飛，洞中擁炬尙寒威。石牀仙竈深深見，何代遺民此息機。

桐溪耆隱集補錄

王僉吉

吳文緯

汪若懿

柴文灝

徐亮

金家修

徐曰畿

張豫翹

胡震源

王兆霖

俞善慶

如續有所得再竢補編炯又識

王椿榮



王僉吉

字師錫，桐廬人。  
康熙中歲貢生。

君山晴望

隔江山色鬱嵯峨，錦石澄潭入畫圖。  
仙叟菌芝留跡在，樵人雞犬入雲無。  
撐空塔似凌浮玉，遠溯臺如隱鬱孤。  
兼有數州風物美，望中表裏接天都。

吳文緯

桐廬人，康熙中歲貢。

古厓一首

古厓何石坐桐君，笙鶴時來靜夜聞。  
雙塔西翔山勢合，兩潮東湊海門分。  
白雲自向樽前度，瑤草常於砌下薰。  
儼受衆山朝絡繹，江天凝望氣烟煴。

汪若懿

桐廬人，康熙中增生。

桐君山

挂席千瀉只俯看，危崖縹渺倚朱欄。  
東峯當午煙常冷，西檜捎雲蓋半殘。  
丹竈寂寥空有錄，青霞俶詭亦殊觀。  
楚辭疑有山精誦，遠挾泉聲出樹端。

柴文灝

桐廬人，康熙中附貢。

前題

突兀起江皋。何年五丁鑿。下有馮夷宮。上有仙伯壘。雲開塔光明。波定松影倒。萬竹蒼山腰。披披風中竊。屈蟠修蛇徑。森竦鍊丹竈。采藥僧未歸。落葉蟻自掃。俯瞰丹厓浮。聊寄蘇門傲。

徐亮

字惠采。桐廬諸生。

嚴州府志。亮父早卒。事節母極孝。母歿。廬墓十三年。疾革。遺命鑿穴廬側以耐。

臨終口占

一生歲月三春夢。十載辛勤宿草墳。七十八齡孺慕畢。而今原下見慈雲。

金家修

字誠齋。桐廬人。嘉慶癸酉舉人。會稽縣訓導。

楊貞女詩

貞女。丹徒縣人。幼字同縣某。未婚。矢志過門守節。事舅姑以孝聞。

江左流風遠。關西世澤延。門閭曾表德。婦孺亦能賢。厥有深閨秀。時當待字年。元霜將搗合。青鏡會攀聯。會看登雲里。行開筮日筵。命胡遭慘酷。疾甚聽沈綿。鶴化棺隨降。鳧飛舄已捐。空房驚噩夢。幽怨入哀絃。埋恨真無地。椎胸莫問天。玦離胡太驟。鏡破孰重圓。業已成孤注。何勞計萬全。如夢人事幻。不轉我心堅。

願守三從義。惟諧再世緣。尊章欣健在。侍奉代周旋。執摯窮欄下。承歡井臼前。姑恩堪識曲。女史待重編。秋菊常馨膳。銅餅自汲泉。綻衣數十指。負米削雙肩。可柰高堂寂。空教宿淚漣。摩笄身欲奮。銜石痛難填。風勁摧貞木。星孤隱女嬋。湘東宜載筆。隴右待題阡。古調遺黃鵠。深林泣杜鵑。將軍能記事。王參戎徵詩 金管有流傳。

徐曰畿

字松園。桐廬廩貢。官貴州貴陽知府。

### 淇縣道中簡張果亭司馬

夜雨瀟瀟晝卻晴。暮春天氣送歸程。花含細蕊香猶蘊。麥漾微波浪未成。兩岸柳陰藏鳥語。幾家茅屋隱雞鳴。卷簾貪看當前景。不減江南道上行。

張豫翹

字桐龔。桐廬歲貢。成豐末殉難。卹贈教諭。

### 留春舫

喚起曉鐘聲。莫遣春歸去。吹落萬桃花。花飛向何處。

### 修篁風榭

危石倚寒玉。長風引曲廊。無絃寫此意。一曲綠陰涼。

胡震源

字箕浦，桐廬諸生。成豐未殉難，卹贈縣主簿。

采桑詞

大婦燈前織竹筐，小姑梳洗學時妝。茆檐挂出團團月，相約明朝去采桑。高處柔桑共倚梯，低枝卻好與肩齊。踏青露溼紅羅襪，只印蒼苔不染泥。

王兆霖

字夢坡，桐廬人。道光丁酉拔貢。候選直隸州州判。咸豐末殉難。

秋日感興

九月疏籬菊有花，西風池館拂朝霞。每於闌外延詩思，且向尊前度歲華。晚近功名譏小草，浮生蹤跡似搏沙。江山半入風塵裏，獨撫青萍幾歎嗟。

俞善慶

字積堂，桐廬人。道光戊子舉人。官於潛縣訓導。

登君山禪院


仙馭排雲不可招，捫蘿攀石上岩巖。忽逢木客貽松子，自有春風喚藥苗。禮塔異僧方出定，浮家仙尉此停橈。憑虛呼吸天光淨，繫表真令萬慮消。

王椿榮

字魯齋，分水縣貢生。流寓桐廬。候選主簿。

校寫聽松草堂集題詞

堪輿積情區。非情曷有理。君臣父子閒。情至理乃起。鬱勃數千年。不平鳴未止。怒若秋江濤。幽入古潭水。嗣宗何爲哭。俗士豈知彼。哀能中其節。哀亦惡可已。可歎蚩蚩氓。恆沙似磨蠹。何論非者非。是者終歸是。奚必試鉛刀。奚必紆青紫。古昔重師儒。山中有桃李。傀儡日登場。流俗悠悠爾。野馬塵埃中。浮雲太虛裏。我自樂爲我。焉用憂如杞。我自有憂樂。不逐世懺喜。秋氣胡蕭瑟。春光胡旖旎。江君發天籟。機緘未能揣。聲音微乎哉。詞華抑末矣。惡臭與好色。寂然驗所以。復見天地心。咸因感而企。欲發醜難覆。青天鋪一紙。



中華民國二十九年六月  
商務印書館

王雲五主編  
叢書集成初編  
于湖小集及其其他一種  
二 册

中華民國二十六年六月初版

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠

\*E五二〇五

章



309